

Ги Де Мопассан Ва Абдулла Қаҳхор Асарларида Аёл Рухиятини Ифодалашда Миллий Ўзига Хосликлар

Жаббарова Малоҳат Ҳамдамовна¹, Ражабова Зулфизар²

Кириш. Мамлакатимиз мустакиликка эришгандан кейин бошланган маънавий тикланиш жараёни ўзбек адабиётини жаҳон адабиёти контекстида қиёсий ўрганишни тақозо этади. Шу орқали жаҳон ва ўзбек адаблари ижодидаги умуминсоний ғоялар талқинига хос типологик хусусиятлар чуқур очиб берилади. Колаверса, мамлакатимизда “Ёшларни замонавий билим ва тажриба, миллий ва умумбашарий қадриятлар асосида мустақил ва мантиқий фикрлайдиган, эзгу фазилатлар эгаси бўлган инсонлар этиб вояга етказиш”да² адабиётнинг роли юксак бўлиб келган. Шу жиҳатдан адабиётда аёллар образининг акс эттирилиши, генезиси, семантикаси ва поэтикасига алоқадор хусусиятларни аниқлаш ҳам бадиий матн таҳлилига доир ёшлар билимини янада чукурлаштиради, миллий ғояларни теран идрок этишга ундаиди. Бу каби муҳим илмий вазифаларнинг ҳал қилиниши назарий ва амалий адабиётшунослик уфқларини кенгайтиради.

Ўзбек адабиётида оқсоч қиз эмас, оқсоч хизматкор аёл образи учрайди. Чўри қиз унинг варианти сифатида келади. “Оқсоч” деганда, биринчидан, бойлар, зодагонлар оиласида ёлланиб хизмат қилувчи аёл, хизматкор аёл чўри тушунилади. Масалан, А.Мухторнинг “Опа-сингиллар” романида “Холнисонинг онаси Ёрмозор қишлоқли бир бойнинг эшигига оқсоч эди” дейилади.

Француз адаби Ги де Мопассон ҳикояридан бири “Оқсоч қиз саргузашти” деб номланган бўлиб, унда француз зодагонларига майший ҳаётида хизмат кўрсатадиган оқсочлар ҳаёти тасвирланган. Бу қизнинг исми Роза бўлиб, у ошхонада фермадаги одамлар овқатланиб бўлгач, ҳаммаёқни йиғишириар, столни артар, идиш-товоқ ювар, ўчоқнинг кулини олар, ликопларни ошхонанинг бурчагида чиқ-чиқ қилиб турган катта ёғоч соат ёнидаги тахтага териб қўярди.

Ҳикояда қизнинг шу ишларни қилиб бўлгач, “уф” деб қўйиши, бир оз ланж, кўнгли нечукдир фаш экани айтилган.

Колаверса, унинг яшаш жойи ҳам кўнгилсиз эди: “Ошхонанинг очиқ турган эшигидан оғилнинг ҳиди ва отхонадан буғланиб кўтарилаётган кўланса ҳид кириб турарди. Ошхонанинг деворлари қорайиб кетган, шифтнинг тўсинларини қурум босган, ундан ўргимчак уялари, қоқ балиқлар, пиёз боғламлари осилиб тушган эди. Қачонлардан бери ошхонанинг чиқитлари тўкилавериб, қасмоқ боғлаб кетган ердан иссиқ кунда буғланиб чиқаётган ўткир ҳиддан қизнинг кўнгли беҳузур бўлиб кетганди. Бунга нариги салқинроқ ҳужрада турган сутнинг чучмал ўткир ҳиди ҳам кўшилиб турарди.

Ҳикоянинг шу ўрнида қуйидагича ажойиб бир рамзий тасвир келтирилган: “Товуқлар гўнгга бағрини бериб роҳатланиб ётар ва қурт-кумурсқа излаб, бир оёғи билан гўнгни сал титкиларди. Буларнинг орасида гердайиб хўрот юарди. У минут сайин бир товуқни кўз остига олар ва астагина қукулаб унинг атрофида айланарди. Товуқ эринибгина ўрнидан турар ва оёқларини эгиб қанотларини ёйиб унга таслим бўлар, сўнг патларини силкитиб чангини қоқар, яна гўнгга бағрини берар, хўрот эса ўз ғалабасидан дарак бериб қичқирав, бошқа ҳовлилардаги хўролзлар ҳам бир-бирларига севги нидосини йўллаётгандек қичқиришиб жавоб қайтаришарди.

¹ Бухоро давлат университети француз филологияси кафедраси катта ўқитувчиси, m_jabbarova@mail.ru

² БухДу талабаси

² Ўзбекистон Республикаси Президенти Шавкат Мирзиёевнинг Олий Мажлисга мурожаатномаси ҳамда Ўзбекистон Ёшлари Форумида сўзлаган нутқидан. Янги Ўзбекистонда эркин ва фаровон яшайлик. – Тошкент: Тасвир нашриёт уйи, 2021. – Б.52



Бу парча тематик-психологик параллелизмга мисол бўлиб, кейинги воқеаларга “эшик” вазифасини ўтаган. У орқали “оқсоқ қизнинг ҳали интим туйғуларга дуч келмагани, жинсий ҳаётни тушунмаслигини билдирилади. Шунинг учун хикояда унинг товуқлар ва хўрз муносабатларига анграйиб қараб ўтиргани алоҳида таъкидланади. Шундан кейинги парча эса унинг асар сюжети давомида “болали” бўлиб қолишига ишора қиласди. Бунда адиб олма деталидан “бала” рамзини англатиш учун фойдаланганки, бу умумжакон бадиий адабиётм анъанаси сифатида эътиборни тортади. Масалан: “Кейин бошини кўтариб, упа сепилган ясама сочдек оппоқ бўлиб гуллаб ётган олмани кўриб тонг қолди”.

Хикоя давомида келтирилган қўйидаги мотив қизни йўлдан урган йигит тимсолига ишорадир: “Бехосдан асов тойчоқ қизнинг ёнидан ўйноқлаганича чопиб кетди”.

Кўйидаги парчалар қизнинг ҳам йигитга бевосита ўзи майл билдирганини айтиш учун келтирилган: “Қизнинг ҳам югургиси, ўйнагиси... келди. Кўзларини юмган ҳолда роҳат қилиб истар-истамас бир неча қадам қўйди, кейин тухум олиб келгани аста товуқхонага кетди. Товуқхонада ўн учта тухум бор экан, уларни уйга олиб борди-да, жавонга қўйди”.

Ушбу парчада тухум ва уларнинг ўн учта эканини таъкидлаш ҳам бежиз эмас. Кўпгина европаликлар учун “ўн уч” баҳтсиз рақам ҳисобланади. Бу билан қизни баҳтсизлик кутаётганига ишора қилинмоқда.

Қизни йигит уйқусида пайт ғафлатда қолдириб, тузогига илинтиради: “Энди кўзи илингандан кимдир тўсатдан икки қўллаб қўкрагига чанг солди. Қиз иргиб ўрнидан турди. Бу, мана шу фермада ишлаб юрадиган, қадди-қомати келишган пикардиялик Жак деган новча йигит бўлиб, кўпдан бери шу қизнинг пайига тушиб юрганди. Бугун қўйхонада қолиб қўйларга қарамоқда эди, қизнинг сояга бориб ётганини кўриб дамини чиқармай аста ёнига борди; унииг кўзлари ўйнаб кетган, соchlарига сомонлар илашган эди”.

Аммо кучда йигитдан қолишмайдиган қиз яхшилаб бир тарсаки урди. Йигит айёрик қилиб, қиздан узр сўради. Иккалови ёнма-ён ўтириб сўзлаша кетишиди. Улар дехқончилик учун яхши келган об-ҳаво, бу йил яхши ҳосил бўлгани, ўз хўжайинларининг яхши одамлиги, сўнг, қўни-қўшнилар ва бутун округ тўғрисида, ундан кейин ўзлари, туғилган қишлоқлари ҳақида сўзлашди; ёшлик чоқларини, кўп йилларга, балки абадий ташлаб келган ота-оналарини эслашди. Айниқса, ота-она ҳақидаги хотиралардан қизнинг кўнгли бузилиб кетиб, йигитга ўзини яқин тутади.

Йигит бундан фойдаланмоқчи бўлганида қиз уни уриб, бурнини қонатади. Шундан сўнг йигит бараваста ва бақувват қизга ҳавас билан, хурмат саклаб, бутунлай бошқача, ҳақиқий севги назари билан боқади.

Қиз йигитга “Жак, мени иззат қилмаганинг ёмон-да” дейди. Йигит қизни “сени оламан” деб алдайди. Кейин у аста-секин совий бошлайди; қиз билан учрашишдан, гаплашишдан қочадиган ва қиз билан ёлғиз қолгани қулай пайт ҳам изламайдиган бўлиб қолди. Шунда қиз шубҳаланиб кўя бошлади, бир неча вақтдан сўнг ҳомиладор бўлиб қолганини билди.

Бошида қиз жуда қўрқиб кетди. Кейин кундан-кун ғазаби орта борди, негаки йигит унга дуч келишдан ўзини шунчалик эҳтиёт қиласди, қиз у билан сўзлашишнинг асти иложини тополмасди.

Бир куни йигит қизга рўй-рост: “Кўйсанг-чи, киши ҳар бир юрган қизини олаверадими?” дейди. Буни эшитиб ғазабланган қиз йигитнинг бўғзидан олиб, уни йиқитиб, ўзининг ҳомиладорлигини айтади. Энди қиз куруқ ваъдага ишонмас эди. Йигитдан кейинга сурмасликни, эртагаёқ уйланишини маълум қилишга онт ичишини талаб қиласди. Бироқ субутсиз йигит қочиб кетади.

Бу хикоя икки қисмдан иборат. Иккинчи қисмда қизга ҳаётнинг турган-битгани азобга айланади. У ҳамиша билиб қолишига, ишдан ҳайдалишини эслаб чўчирди. Шунинг учун ҳолатини сездирмаслик мақсадида “машина сингари ишларди”.



Ёзувчи қизнинг руҳий ҳолатини шундай тасвирлайди: “Эрталаб у ҳаммадан олдин туриб, соч тараганда қарайдиган синиқ ойначага белини солиб, жуда дикқат билан қарап ва бугун билиб қолишмасмикан, деб бош қотиради. Кундузлари у дам-бадам ишини қўяр ва фартук тагидан билиниб турмаганмикин, деб тўлишиб қолган қорнига қараб-қараб қўярди. Ойлар ўтди, қиз ҳеч сўзлашмайдиган бўлиб қолди. Бирор гапирса тушуммай, қўллари бушашиб, ўзини йўқотиб қўярди”.

Бир куни эрталаб почтальон қизга хат келтириб беради. Қиз хатни ўша ўзини алдаб қочиб кетган йигитдан деб ўйлади, чунки қиз саводсиз бўлади.

Хат ўлим тўшагида ётган онасидан эди. Қизи келган куни онаси узилади. Эртасига эрталаб Роза, киши кўрса қути учадиган даражада озғин, етти ойлик ирванди бола туғади. Қиз уйдагиларга эрга текканман, лекин ҳозир болани олиб борар жойим йўқ деб, қўшнисига ташлаб кетади. Улар, ўзимиз бокиб берамиз, дейишади.

Фермага қайтиб келган аламзада қиз кўнглида уйга ташлаб келган нимжон маҳлуққа нисбатан шу дамгача ўзига номаълум янги бир меҳр пайдо бўлган эди. Бу меҳр боладан йироқда бўлганлиги учун ҳар соат, ҳар дақиқа кўнглидан нари кетмайдиган янги бир изтироб манбаига айланади. Унга айниқса азоб берадиган нарса боласини эркалаш, бағрига босиш, унинг иссиқ вужудини кучоғига олиш истаги эди. Кечалари кўзига уйқу келмас, кундузлар хаёлидан бола нари кетмас эди, кечқурунлари бўлса барча ишлардан бўшагач, ўчоқ ёнида алангага тикилганича хаёли узоқларга қочган одам сингари ўтиради.

Фермадагилар унинг ҳакида сўзлаша бошлади, ҳазил қилиб ундан «жазманини», унинг ҳуснини, бўй-бастини, бойлигини сўрашар ва тўй қачон, бешик тўйига бизни ҳам айтасизми, дейишарди. Қиз эса кўпинча қочиб кетар ва пана жойга бориб йиғларди, чунки бу саволлар унга игна каби санчиларди.

Қиз шу гап-сўзлардан нарироқ туриш учун жон-жаҳди билан ишга ёпишар, ҳар дақиқада боласини ўйлар ва қандоқ қилиб кўпроқ пул орттириш устида бош қотиради.

Қиз, шундай ишлаш керакки, хўжайнин ойликни оширсин, деган қарорга келади. У аста-секин бутун уй ишини ўз қўлига олади. Иккинчи оқсоғни сиқиб чиқаради, чунки бир ўзи икки кишининг ишини қилганидан кейин униси ортиқчалик қилиб қолди. Қиз нонни, ёғни, шамни, ҳуд-бехудага товуқларга сепиладиган донни, исроф қилиб, молларга бериладиган ем-хашакни, ҳамма нарсани тежай бошлайди. Хўжайнининг пулинни ўз пулидай эҳтиётлар, бозорга борганида фойда томонини кўзлар, фермадан чиқариб нарсаларни қимматга сотиб, дехқонларни авраб, улар келтирган нарсани арzon олишга тиришарди, шунинг учун ҳам ферманинг бутун савдо-сотиги, хизматчиларни ишлатиш, омборларнинг калити, ҳаммаси унга топширилди; ҳадемай ўрнини бирор босолмайдиган, ҳамма нарсага кўз-кулоқ бўлиб турадиган бўлиб қолди, унинг эҳтиёткорлиги орқасида ферма гуллаб кетди. Теварак-атрофга «Валлен фермасидаги хизматчи қизнинг» таърифи кетди. Хўжайнининг ўзи ҳам ҳар ерда сўзларкан: «Қиз эмас, соғ олтин» дерди.

Вақт шу таҳлитда ўтар, лекин ойлик ошмас эди. Бола саккиз ойлик бўлиб қолганда қиз уни бориб кўриб келади. Боласи уни танимай, энагасини кўргач, қўлларини чўзиб унга қараб толпинаётганини кўриб, аёл йиғлаб юборади.

Аёл боласига кўнгил сирларини очар, унга ўзининг азоб-укубатлари, тортган ташвишлари, ҳаяжонли, умидларини айтарди ва қаттиқ эркалатишлари билан боланинг жонига тегарди.

Болани бағрига босиш, чумилтириш, кийинтиришлар унинг учун бениҳоят шодлик баҳш этарди; ҳатто бола булғатиб қўйган нарсаларни ювиш, тозалаш ҳам унинг учун катта баҳт бўлиб, гўё бу хилдаги ишлар унинг оналик ҳуқуқини тасдиқларди. У болага боқаркан, шу ўзининг боласи эканлигига ҳайрон бўлар ва уни тебратаркан секин-секин: “Ўзимнинг ўғилчам, ўзимнинг ўғилчам!” деб такрорларди.

Қиз қайтишда йўл бўйи йиғлаб кетди; фермага келиши биланоқ норғил, қирқ бешларга кирган,



хушчақчақ, тиришқоқ, иккита хотини ўлган табиатан ҳеч хижолат бўлмайдиган хўжайини уни қақириради ва уйланиш таклифини билдиради. У қизга: “Сен яхши қизсан, эс-хүшинг ҳам жойида, меҳнаткаш, тежаб-тергайдиган қизсан. Сен сингари хотиннинг турган-битгани – хазина”, – дейди.

Қиз рад жавоб айтгач, фермер ҳайрон бўлади. У оқсоқ қизнинг бу таклифга кўнишига шубҳа қилмасди, чунки бу таклиф қиз учун мактанаарлик, ўзи учун эса жуда фойдали, негаки округдаги баҳрибисотлик қизлардан ҳам кўпроқ фойда келтирадиган хотинга эга бўларди. Қиз рози бўлавермагач, хўжайини унга зўрлаб уйланади.

Оқсоқ қизлар кўпинча бекага айланар, лекин бунинг орқасида на уларнинг ҳаёти, на урф-одати ўзгарарди. Роза ҳаётида ҳам шундай бўлади.

Оқсоқ ҳомиладор бўлавермагач, хўжайини асабий бўлиб қолади. Бир куни қўшни болага ёмон гапирган хотинига: “Агар шу бола ўз ўғлинг бўлганда бундақа муомала қилмас эдинг” дея дакки беради. Шу тариқа эри оқсоқ туғавермагач, унга овқат маҳалида сўзламас, қарамас, худди хотинини ёқтиргмагандай, ундан жиркангандай, бирор нарсани пайқагандай кўринарди. Буларнинг барига фарзандсизлик сабаб эди. Эри оқсочга: “Сигир туғмаса, ишдан чикқан бўлади. Туғмаганидан кейин хотин киши ҳам ишдан чикқан бўлади-да”, – дейди. Бу гапдан сўнг хотин ўпкасини тутолмай йиглайди. Шу кундан бошлаб унинг фикр-ёди бола туғиш, яна битга бола туғиш бўлиб қолади; кўринганга ўз дардини айтадиган бўлади.

Кўшниларидан бир хотин унга, ҳар кун кечқурун бир пиёла сувга бир чимдим кул солиб эрига ичиришни буюрди. Фермер жон деб қўнади, лекин бу нарса фойда бермади.

Улар: «Балки, бирон махфий чораси бордир», деб ўйлаб, дараклай бошлашади. Фермадан ўн ҷақирим нарида яшайдиган чўпоннинг дарагини айтишади. Валлен амаки отга миниб ҳалигидан маслаҳат сўрагани кетади. Чўпон унга қандайдир кўкат қўшиб пиширилган ноннинг юзига чизиқлар чизиб беради ва эр-хотин ётар олдидан ва тургандан кейин бир бурдадан есинлар, деб буюради. Нонни ушоқларигача кўймай ейишса-да, бу ҳам фойда бермайди.

Бир муаллим уларга қишлоқлilar билмайдиган, лекин албатта наф қиладиган йўл-йуриқ кўрсатади. Бўлмайди. Кюре уларга Фекан зиёратгоҳига бориб “тоза қон”га сифинишларини маслаҳат беради.

Хаммаси беҳуда бўлади. Шунда Роза, бу менинг биринчи гуноҳим учун бернлаётган жазо бўлса керақ деб ўйлайди ва умидини узади.

Хотин ҳасрат-надоматдан сўла бошлайди, эри ҳам беҳуда умидлар орқасида анча озиб, қариб қолади. Бора-бора эр-хотин орасида душманлик ўти ёнади. Эр хотинини уришар ва урар, кунбўйи хотинининг жигига тегиб, тунбўйи тўшакда ғазабига чидолмай ҳақорат қиласади. Ҳатто у бир куни кечаси, қандоқ қилиб хотинининг жонига қаттиқроқ тегишини билмай, хотинига ўрнидан туриб, тонг отгунча ҳовлида, ёмғирда туришни буюради. Бу азоблар жонига теккан оқсоқ олти яшар боласи борлигини айтиб қўяди. Бу гапдан сўнг бефарзандсизликка ўзи сабабчи эканини англаган эр: “Ҳамон ўзимизда бола бўлмаганидан кейин, бориб уни, сенинг болангни олиб келайлик. Мен биронта бола асраб олсаммикин, деб юрган эдим, мана ўзи топилиб қолди, ўзи топилди, мен Кюредан биронта кўзлаб юрган етим боланг йўқми деб сўраган эдим”, – дейди. Шундай деб, эр йигидан бўртган ва жинни бўлаётган хотинини ўпа бошлайди. У ёқдан-бу ёққа юрар ва суюнчи ичига сигмай, қайта-қайта: “Худо ҳақи, хурсандман, тўғриси, жуда хурсанд бўлдим, жуда хурсандман” – деб айтади.

Худди юқоридаги каби эрнинг хотинни хизматкорлик учун танлаши мотиви Абдулла Қаҳҳорнинг “Қўшчинор чироқлари” романида ҳам учрайди. Романда “хикоя ичида хикоя” усулида келтирилган парчада айтилишича, бир элликбоши бир аёлга совчи устига совчи қўяди. “У аёл шунчалик чиройли эдими?” дейишса, эс-хуши жойида, қадди-қомати келишган, танжони соғ, куч десангиз битта ман-ман деган йигитнинг ишини баҳузур қиладиган хотин эди-да. Элликбоши унинг хуснига маҳлиё бўлипти дейсизмн, унга беминнат хизматкор керак…”, – дейди.



Шунда аёл: “Майли, тегсам тега қолай, лекин бир шартим бор: шартим шуки, мен қизимни ўгай отанинг уйига олиб бормайман, отасидан қолган ҳовлини сотиб, шунинг пули билан бирон қариндошимга топшираман; агар хўп десалар, тузукроқ пул бериб ҳовлини олсинлар”, – депти. Бунақа шарт элликбошига албатта хуш ёқиб, дарров ҳовлини ўз баҳосидан анча ортиқа олипти. Хотин бошқа нарсаларини ҳам сотиб тап-тайёр бўлиб турган экан, қайноаси ва қизини олипти-ю бир кечада зим-гойиб бўлипти-қолипти. Элликбоши у ёққа от чоптирипти, бу ёққа от чоптирипти – йўқ! Хотин ўз қишлоғига – элликбошининг қўли етмайдиган Найманга кетган экан. У ерда Фармонқул деган бир кишига тегипти.

Аёлнинг бу тадбиркорлиги ўзбек халқ эртакларидағи тадбиркор хотин ҳикоясини ёдга солади. Ўша аёл босмачилар билан отишмада вафот этади. Ҳанифа (Канизак) унинг қизи бўлиб чиқади. Асар охирида Курбон ота унинг амакиси, Усмон ота дадаси экани маълум бўлади.

Адабиётда қайнона образи ёритилган асарлар ҳам алоҳида эътиборга молик. Бунда кўпинча қайнона ва келин муносабати ёритилса, Абдулла Қаххор “Қўшчинор чироқлари” асарида куёв ва қайнона муносабатига оид баъзи чизгиларни келтирган. Бунга Сиддиқжоннинг ичкуёвлиги сабаб бўлади. Зуннунхўжа ўрнидан рўзгорни бошқарадиган қайноаси қизи Шарофатни тўйгача ихтиёрини қарол Сиддиқжонган топшириб қўйганини асло кечира олмайди. Бунинг учун у қизини тез-тез қарғайди ва унга қўшиб неварасини ҳам камситади. “Э, ўл, итялок! Дайди итнинг тумшуғини ёғ қилмай ўл! Итга берсанг ошингни, итлар ғажир бошингни! Кошки ўз бошини ғажиса!” – дейди у. Яна у қизига “Боланг эрингга ўҳшамайди» деган эди. Шарофатга онасининг бу гапи жуда алам қиласи. Энди “итялок” дейишини ғар ҳам кўтара олмас, тикка юлишар эди. Бироқ унинг тили қисиқлиги бунга йўл кўймас эди.

Қайноаси колхозга кирмоқчи бўлган Сиддиқжонга ўзбек халқ мақоллари асосида: “Уйни уй қилган эрнинг топишию хотиннинг кўрпа иши! Тониши-ку йўқ, бор ерни йўқотадиган эрга тушиб қолган қизим йўқ!” – дея дакки беради. Уни ичкуёв сифатида камситаверади. Натижада бундай муомала эр-хотиннинг можаросига, “қўйди-чиқди”сигача бориб этади. Сиддиқжон “Янгичасига айтганда, мен қизингизни хоҳламайман, эскичаси керак бўлса – уч талоқ қўйдим!” деб, этагини қоқиб ўрнидан туради-ю, жўнайди. Шарофат сенсираб, “болангни олиб кет” дегани, айниқса, унинг сенсирагани бу уйга боғлаб турган риштани батамом узиб юборади. Сиддиқжон болани беланчақдан олиб, бағрига босганича кўчага чиқиб кетаётганида, Шарофат боласини олиб қолади.

Сиддиқжоннинг онаси Хадича хола умрини хорлик-зорлик тортиб ўтказган ҳамма кишилардай тез қариган, лекин ҳамма қишлоқ қарияларидай кексаликка сўз бермайдиган, ғайратли, тетик, миннатли ошдан беминнат муштни афзал кўрадиган бир кампир бўлиб, бу ерга бир тош мўлроқ келадиган ўз қишлоғи Баҳрободда кичик ўғли Обиджон билан турар эди. Сиддиқжон аввал, аравасоз устага шогирд, ундан кейин бу ерга келиб Собиржонқорига қарол бўлиб юрган вақтларида Хадича хола уни ўз қаноти остида хисоблар эди, ўғли Зуннунхўжага ичкуёв бўлгандан кейин ўрдак тухумини очган товуқдай бўлиб қолди, шунинг учун бу ерга жуда кам, йилда бир ёки икки мартагина келар эди.

Романда Зиёдахон опа: “Эркак тортинмайдиган хотинни кўрса албатта бузук деб ўйлади. Русларда ҳеч, ҳеч ҳам шунақа эмас экан. МТСда рус эркаклар, рус хотинлар бор. Шуларнинг юриш-туришини кўриб кишининг бирам ҳаваси келади” деб, аёлларга тухмат қилувчиларни қоралайди. У бир куни қуртга барг кесгани тутга чиққани, аммо қайтиб туша олмай турганида Андрей деган бир тракторчи рус йигити келиб қолиб, тушириб қўйгани қўлини чўзса, тутдан ўзини ташлаб юбориб, оёғи синаёзгани, буни кўрган Андрейнинг бирам аччиғи келгани ҳақида сўзлаб беради.

Романда халқнинг “Хотин, яхши хотин эркак кишининг бўйни. Яхшиликка бурадиган ҳам бўйин, ёмонликка бурадиган ҳам бўйин” мақоли келтирилган.



Хулоса. Ги де Мопассан ва Абдулла Қаххор, аввало, ўз миллий адабиётида новелла (ҳикоя) жанрини такомиллаштиришдаги хизматлари билан яқин туришади. Яна ҳар иккала адебнинг танқидий реализм анъаналарига мувофиқ ижод қилиб, асарларида ўзлари мансуб ҳалқнинг миллий ҳаётини, ўз даври кишиларининг турмуши, руҳиятини ўша замон долзарб муаммоларига боғлаб танқидий рух билан тасвиrlаганлари ҳам ўхшашдир.

Абдулла Қаххорнинг поэтик маҳорати миллий адабиётимиз заминидан ташқари мумтоз рус адабиёти намояндалари – Толстой, Тургенев, Гоголь, Чехов ижодий тажрибалари билан ҳам кўп қиёслаб ўрганилган. Лекин адаб жаҳон адабиётидаги ютуқларни ҳам имкон даражасида ижодий ўзлаштириб, миллий насримизда янги саҳифалар очган. Бу жиҳатдан адаб ҳикоялари билан француз машҳур ҳикоянавис Ги де Мопассаннинг шу жанрдаги асарлари ўртасида айрим ўхшашликлар, типологик белгилар борлиги кўринади. Бундай фикрни уларнинг ҳикояларида аёл тасвири мисолида ҳам айтиш мумкин.

Ги де Мопассан француз Абдулла Қаххор ўзбек ҳалқининг ҳаёти, инсоннинг ички ва руҳий ҳолати тўғрисида ўлмас асарлар яратган адиллардандир. Ҳусусан, улар яратган ҳикоя ва романлардаги аёллар руҳияти, ҳалқ ҳаётининг майший, этнографик, иқтисодий ва маънавий манзаралари яққол тасвирида ўзига хосликлар бараварида айрим уйғунликлар борлиги алоҳида ётиборни тортади.

Сўз санъати фақатгина муштарак қонуниятлар асосида иш қўрмайди. Ҳар бир миллий адабиётда алоҳида бир ҳалққа хос руҳият, менталитет, қадрият ва урф-одатлар ўз бадиий ифодасини топади. Агар масалага шу нуқтаи назардан қаралса, Ги де Мопассан ва Абдулла Қаххор адабий қаҳрамонлари, ҳусусан аёллар образи миллий ранг ҳамда жилоларга эгалиги, ўзбек ҳалқининг ўзигагина хос жиҳатларни бадиий тажассум этганлиги билан ажralиб туради.

Фойдаланилган адабиётлар рўйхати

1. Ўзбекистон Республикаси Президенти Шавкат Мирзиёевнинг Олий Мажлисга мурожаатномаси ҳамда Ўзбекистон Ёшлари Форумида сўзлаган нутқидан. Янги Ўзбекистонда эркин ва фаровон яшайлик. – Тошкент: Тасвир нашриёт уйи, 2021. – Б.52
2. Ги де мопассан. Новеллалар. Тошкент. Faafur Fулом номидаги адабиёт ва санъат нашриёти. 1987 й. 642-б.
3. Абдулла Қаххор. Асарлар. 5 жилдлик. Сароб (роман). Ҳикоялар. Тошкент. Faafur Fулом номидаги адабиёт ва санъат нашриёти. 1987 й. 261-б.
4. Абдулла Қаххор. Асарлар. 5 жилдлик. 3-жилд. Ўтмишдан эртаклар. Қиссалар. Тошкент. Faafur Fулом номидаги адабиёт ва санъат нашриёти. 1988 й. 301-б.
5. Jabborova Malokhat Khamdamovna. THE INFLUENCE OF THE NATIONAL WORLDVIEW ON THE IMAGE OF THE WOMAN IN THE WORKS OF GUY DE MAPUASSANT AND ABDULLA KAHHAR". ELECTRONIC JOURNAL OF ACTUAL PROBLEMS OF MODERN SCIENCE, EDUCATION AND TRAINING. APRIL, 2022 - 4. 61-64 бетлар.
http://journal.buxdu.uz/index.php/journals_buxdu/article/view/7645/4861
6. Jabbarova M.X. "TWO STORIES-TWO DESTINES". Австралия, 2021 Journal of Contempory Issues in Business and Governement Vol.27, N.2,2021. 5559-5569p,
http://journal.buxdu.uz/index.php/journals_buxdu/article/view/2056.
7. Jabbarova M.KH. "'STORY TYPOLOGY'" VESTNIK NAUKI I OBRAZOVANIYA №21(99) Chast 2. 2020. 65-67 p.
<https://cyberleninka.ru/article/n/tipologiya-rasskaza>
8. NARZULLAYEVA, Dilfuz. Theolinguistics in Modern Religious Discourse. ЦЕНТР НАУЧНЫХ ПУБЛИКАЦИЙ (buxdu.uz), 2023, vol. 30, no 30.
9. BAFOEVNA, Narzullaeva Dilfuz. Theolinguistics in Modern Religious Discourse. INTERNATIONAL JOURNAL OF LANGUAGE LEARNING AND APPLIED LINGUISTICS, 2023, vol. 2, no 3, p. 18-21.

